

資治新書

二集

366.1
S4037
6

資治新書二集卷三

湖上笠翁李漁蒐輯 婿沈心友因伯訂

學政一 諸賢否

查取教官賢否事

兩浙張夢匪諱安茂
文宗華亭人

照得教官模範諸生表率多士職任所關甚鉅。自故明之世。類用衰老。明經備員。以致日暮窮途。不思進取。惟以較量修脯爲事。置課執砥行于罔聞。是教諭訓導之名。虛設久矣。自我清定鼎以來。所授教職。類選時髦。間遴宿彥。雖未必人人稱職。而衣冠氣象。倏爲改觀。然朝廷用人之意。則加厚儒流。恐儒流視躬之心。仍自菲薄。茲本道蒞任伊始。應行各屬教職。取生員優劣姓名。以備黜陟。然欲取生員之優劣。先詢教官之賢否。未有營私念切。而肯以公道評人者也。合行查取。爲此仰府廳州縣官吏。照牌事理。仰將所屬各學教官。修造履歷。分列年志。力行學識。教規四事。逐一填註。另開考語。總括實事。不得用四大浮詞塞責。務須博訪詳實。有裨勸懲。限文到十日內造送。云云

學政二 取優劣

諮訪優劣之一

兩浙學憲張蔭匪
華亭人

爲歲考事。照得教化凌頹。起于學校無政。風俗傷敗。始于衿佩不倫。本道巡歷所至。必先廉訪優劣。以爲勸懲。誠以文學不先德行耳。合行密訪。以待歲試發落。爲此仰府卽將屬學生員。密行諮訪。如有不孝不弟。敗倫傷化。出入衙門。挾媚有司。干證詞訟。嫁禍射利。攬納錢糧。與賭博姦淫。黨惡害民。諸不法事。備將真蹟實據。列款密報。以憑究黜。優行諸生。亦須果能刻苦讀書。孝友足述。屏蹟公門。輿論無間者。詳開行實。候本道接臨之日。各揭申報。以憑優賞寵異。教官不得曲徇情面。或以平常細事。薦舉置純修實行。于不問。或以曠學小疵。塞責含元惡。大愆于無聞。以及有優無劣。漫不經心者。本道別有訪聞。該教官立行斥逐。學吏書依律重究。各宜慎之。

諮訪優劣之二

張蔭匪

爲再飭實舉優劣事。照得士子爲四民之表。獎罰優劣。係正風化之綱領。但須奉行其事者。廉訪有素。灼見無疑。或一事而足定生平。或多端而積成善惡。虛心博訪。採之道路。察及家庭。據所聞見。按實直書。先期封報。以憑覆核。誠恐各屬視爲緩務。虛報塞責。合再嚴飭。爲此仰府廳不必知會教官。教官不必轉申。

提調務各多方察核得其實蹟不必胥吏代書徑用函揭手陳限半月之內密封送道如報優徒爲奸輩護衣巾報劣只爲孤貧脩嫌怨除駁行外仍嚴提經承重究本官揭參

學政事

江西南西
學政張玉甲
諱能麟
大興人

照得衣頂之給原以優老並或壯年有志而廢格于病者非漫以名器假借不自愛鼎之輩爲護身符也本道訪聞此中衣頂各生每每出入衙門建言興訟悍然與子衿爭雄儼然與有司抗執蓋以考校既所不及而查取優劣教官又復寬之繩束亦何怪其號爲鐵秀才而肆無忌憚也方今功令森嚴凡甲乙兩榜及貢監之在籍者悉責成查察有過必舉況此輩現著青衿豈容姑縱合就飭行爲此仰府州官吏照牌事理卽便通行各儒學備查該學衣頂生員共若干名某某于某年告老某院批允果否年已六旬某某于某年病廢告退某院批允曾否痊可察果年過六旬以上者爲一項病發難痊者爲一項素行不檢包攬把持教唆起滅者爲一項造冊併具劣蹟報道以憑覆核斥究此外年青病愈者盡數查出一例起送補考或候酌量收復庶才者不終廢而劣者知所做而本道有教無類之念亦庶幾其克盡矣

查文生優劣

陝西
學憲徐靜菴
諱明輝
蕪湖人

爲學政事。照得士不敦行。風斯日下。本道職司風教。紀綱所藉。以提撕警戒。彰朝廷勸懲之公。者惟優劣一典。年來視爲具文。惟憑開報於廣文。廣文而賢者。猶或自出手眼。若老耄不振之輩。無不聽熒。門斗受制學霸。一番採訪。祇供一番之吮吸耳。本道業已申飭於番。乃檄行已久。考校將竣。該府廳杳無揭報。豈真平原之無抑南陽之不可問也。合再嚴催。爲此仰府廳官吏。查照先今事理。速將各屬學生員優劣。學役蠹橫等項。虛公體察。不須套語。確開事蹟。定限數日內報。道以憑覆核。勸懲施行。然必巨惡大愆。事有真據。賞一人而不賞者。勸罰一人而不罰者。警庶教化。聿新士風。丕變藉該府廳相成之誼。不淺。慎勿以小過塞責。

查武生優劣

張玉甲

爲嚴察武生劣行。以重歲典事。照得武生初進。其途也。庸無紅案。以列名無專官。以董率無歲考。降斥之條。無巡試劣行之報。因而冥頑暴戾。武斷扛幫。多不以鼎自愛。致該前院題奉。欽依一切降斥劣行。悉與文生同列。雖躍冶漸覺可鑄。而積染未免移人。且揚固囂。凌族聚之鄉也。保無內行不立。入不知有倫常。簞置弗飭。出不知有廉恥。以及賈勇而前。睚眦必報。三章罔守。刀筆爲雄者。此皆當門之棘。鋤之宜蚤。

合就嚴察。爲此仰府廳官吏。照牌并遵奉。欽依事理。速將各屬學武生。密察素履。如有忤倫裂檢枯惡稔奸。並前種種穢跡者。許卽詳列事款。具揭報道。以憑覆該創懲施行。培嘉禾而去稂莠。諒有同心。慎勿以具文相視。

學政三 查匪類

查匪類以清學校事

江南張西山 諱能麟 學憲宛平人

照得宮牆巍峻。一切娼優隸卒。刑喪過犯之輩。嚴拒而不許入。正以別凡在士林者。品望清高。人不可及也。乃近訪有等身在黷門。心馳歧路。或狎于優俳。而不恥。或甘爲人役。而不辭。或肆惡以恣貪。或淫行以傷化。是真所謂敗群匪類。有玷宮牆。真難一日容於學校者也。何該學教官。竟如聾瞶。毫無見聞。縱入筵之豚。而不知追見。躍冶之金。而不能鑄。此皆由於各學門斗。受若輩之酒食賄賂。而矇蔽教官。匿不上聞也。卽如青衿竄入公門。甘爲胥役。此人所易見者。尙且知而不舉。又安望其舉大奸巨慝。而發之哉。則教官學役。洵不能辭其責矣。除將該學生員某某等行學除名。另提懲創。并該路門斗吏書解究外。擬合通行嚴飭。爲此仰府官吏。照牌事理。卽便轉行各屬學。查有前項縱恣不檢。敗群匪類。及竄入公門。甘爲胥

役而名掛蠶籍者。即便開具劣名款蹟。密報本道。以憑革究施行。其有曾經黜革。學冊無名者。不在此例。

學政四

申劣給

申學臺

甘泉
縣令蔡蓮西
江寧人

爲督課之令日嚴。應給之欠愈積。謹摘取其尤。仰藉憲威懲治。以砭錮習。以策輸將事。照得今日之錢糧。無項可寬。無時可緩。所恃爲四民之首者。應期輸納。庶幾編戶小民有所矜式。而不爲頑梗。不謂抗糧之習。反自學校始之。邊隅小邑。其青衿舉止。動擬紳貴。一入蠶宮。卽喜占耕田地。不慣輸納錢糧。里胥莫可如何。代比代賠。不一而足。有時情極而稟之縣官。縣官念屬子衿。不便遽懲以法。或出示曉諭。或差役押催。則又負嵎毆差。燬裂告示。卑職隱忍多時。以致積年欠逋。莫可數紀。近以歲參考成在卽。各臺催檄如雷。里催不應。差催不行。只得親往各鄉。理論情求。幾類卑田乞食。冀于打動良心。乃各衿橫肆如故。非止己糧不納。且見樂輸恐後者而笑之。此類甚多。然未有若某某二生者。甘泉屢遭屠戮。備極殘荒。近又以王逆之叛。受害獨甚。以致遺丁不滿百數。地上一望蒿萊。而又路處極冲。殘驛支持不住。錢糧額數。原不甚多。追徵之難。嘔盡心血。甘邑花戶錢糧。不過論升論合。計錢計分。而兩生戶內米至若干石。銀至若干千。

兩則亦居然大戶矣。六年之數不敢問。七年之數尙欠十分之七。至于殘驛倒斷。卑職集衆公議。限納站價。急救燃眉。合邑士民。無不勉力接濟。而其間站銀。獨多者。惟此兩生。悍然獨抗者。亦惟此兩生。屢次差役。往催俱飽毒拳。而返實以冒役者。辱官投鼠者。傷器如此。兇頑而不一加懲創。恐諸生效。尤于二生民戶。效尤于衿戶。甘泉一邑之錢糧。將來不可復問矣。況今功令森嚴。凡縣官錢糧。完不及額。行歲參分數。輕則罰俸降級。重則革職提問。且積縣屬之不完。累及府廳。積府屬之不完。累及道司撫院。絲聯櫛比。曾不少遺。獨于頑鈍無忌之劣生。反爲功令所不及。恐朝廷無此法紀。而憲臺聞之。未有不奮然髮監者也。以此不避怨尤。冒瀆憲聽。乞將生員某某。暫行降革。俾與齊民一同嚴比。俟其錢糧完後。仍許申請復學。暫懸故物。以待之卑職實從。國課起見。非與衿士爲讐也。

學政五

復衣頂

懇恩詳覆等事

金華李鄭園 諱之芳
武定人

看得戴之甲。向因戴之乙。搆毀骨肉之間。牽纏帷薄之事。而指姦無據。歷讞情節。已瞭然矣。惟是之甲。向以此坐黜。未蒙允復。今嘖嘖復爲是請者。蓋因詿誤被放。情有可矜。冀一開自新之階。而不卽于終身淪

棄也。況其才有可觀。是敢特爲申請。但歷訟顛末。屢蒙憲審已明。伏乞洞燭前案情由。移送學道。准其收復。總屬憲臺憐士盛心。而賜之再造也。

懇恩詳復事

仁和 岳華山 諱鍾淑
邑宰 武進人

看得某某等。欠糧不納。原視戶首生員。張某爲樣。一人不納。羣而和之。故卑縣抗糧之申。不得不以張某爲首。革追自難寬宥。及經詳革之後。不惟本生戶內全完。而合圖士民無不輸將。及額亦以張某爲樣也。是一張某者。向爲罪之魁。而今則功之首矣。據呈哀控。求復衣頂。合無請賜矜全。仍施作養。倘得還其故物。則將來之鼓勵鄉民者。愈力矣。

學政六 嚴守祠

查冒濫祀生

江南 張西山 諱能麟
學憲 宛平人

照得名賢固不可以無後。名器亦不可以假人。從來奉祀一生。得以循例批給衣頂者。良爲崇德報功。妥先賢之血食于千秋耳。然考之典例。非建有專祀。設有丁祭者。緊不得濫徵。乃年來請乞頻仍。保勘扶捏。不問祠之爲公。爲私。并不究祭之爲無。爲有。朦朧告給。貼報招謠甚之。市猾執袴亦青其衿。狼子狐羣混

托支裔恐先賢有知將不勝其怨恫也。合就清察。爲此仰府官吏照牌事理。即便轉行各屬學立將奉祀各生。無論新舊。逐一挨年順月。盡數查出。備開某代先賢某人。有何功德事業。彪炳簡冊。於某年間建祠設祭。某年間奉某督學批給奉祀。一向有無襲替。或卽有勛業在地方祠祭尙缺者。亦須詳悉報名。不得漫借舉勘。扞言扶同欺冒。至于孝行岐黃之士。向例亦批衣頂。然日久滋弊。並有不由本道衙門批行者。殊多冒濫。通限一井查明。半月內備造清冊送道。以憑查核。

學政七

舉鄉飲

通行各屬

江南張玉甲
諱龍麟
學憲

爲申飭鄉飲。以光大典事。照得鄉飲一舉。肇之令甲。必年高德邵者。肅之几筵。始足風勵名教。乃至今日俗套相循。濫觴已極。有司憑開報於學。博學博任。寒煖於諸生。以保結叢賄賂之門。以資禮加僉王之輩。致令姦修者羞與爲儒。旁觀者蒙口而笑可訝也。至屆期敦請。必先確覆某賓介宦績鄉評何若。某耆老享年素行何如。具詳本道批允。方始舉行。此又欽飭全書開載甚悉。今俱土苴視之。或先開後報。或報而失真。一惟塗飾了局。更老鉅典。不敬孰甚。合就嚴飭。爲此仰府官吏照牌事理。即便通行各屬。今後凡

遇正望冬朔。舉請鄉飲。必確核各賓僎耆老。鄉評宜績。年高德邵。堪爲一方典型。輿論所共推服者。備具事實。總括真切看語。于一月前具詳本道。以憑覆核批允。方許至期敦請。如舉莛不當。及申報愆期者。師生人等一體追論不貸。

學政八 旌節孝

詳各臺

江南張玉甲諱能麟學憲

遵例表揚節孝。懇賜題旌。以闡幽谷之光。以昭篤倫之化。事竊惟忠孝節義。人之大綱。而彝倫之攸敘。攸敦。有關化理。然必導揚激勸於上。而後化成俗美于下。本道謬膺學政。風教固爲帑責。磨礪竊有素心。凡事關倫常節孝。無不加意獎勵。每歲科考竣。或批給匾。或量行賞賚。俾知觀感。茲據蘇州等府州彙報所屬孝子節婦。行實姓氏到道。除剗股傷體。爲會典所禁。與年例未合者。不得獎敘外。所有孝子陳龍禎等。節烈張氏等。悉皆深閨弱質。亦或委巷編氓。溫清罔渝。靡他自矢。或未亡而隆孝。養于翁姑。或孝弟而兼敦睦于族里。雖未乞學問之靈咸。有裨綱常之重荷。非闡厥幽潛。被以錫命。曷以俾蘭馨桂馥。勒金石而不刊。野旄村倪。鼓忠義而知奮乎。察職衙門于役事竣。例應表揚。今自前院蘇具題請旌而後。歷有年

所。其間遷轉不常。久未舉行。以致茹荼之苦。節尙淹。貢米之至孝莫聞。是非所以重風化。而仰贊 皇上
敦倫孝治之上理也。伏遇憲臺節鎮此邦。主持名教。謹彙各行實上。請仰乞採擇題旌。表厥宅里。庶幽光
不淪夫衰草。孝治永賁於遐方矣。云云

孝子徐獻章。係本縣民。襁褓之夫。默通詩書大義。耒耜之子。能酬毛裏深恩。泣血療父。從醫士之言。始嘗
藥而繼膏。冀。啜粟奉母。以隻影之身。朝貢米而夕貢薪。謂宜蓼莪無愧。乃更風木永思。塋封兩代。墓廬三
年。行其里者。王公大人。爲之改容。矜其名者。走卒兒童。悉知起敬。據里隣生員公舉。縣府覆看詳道。該本
道參看得徐獻章。孩心未鑿。至孝克敦。觀其哀號療父。拮据奉母。而且銖積以封兩代。廬墓至徹三年。一
腔血忱。有足多者。亟應表閭。以爲世則。

孝子李騰芳。生遭貧窘。時際艱辛。勉萊綵以娛情。服鶉衣之百結。父遊不返。經年行乞尋踪。母病累危。徹
夜號天減算。此其怙恃之真。非由學慮所致也。旣無間于人言。宜邀榮于 國典。據鄉保某等公舉。縣府
覆看申道。該本道參看得李騰芳。家鮮宿春。孝隆一本。承顏順志。不學問而明倫。減算告天。惟知年而引
懼。至跣號尋父。逆旅經年。尤覘至情。允宜旌揚。以彰風勵。

節婦居氏。故民鄒翀妻。年二十九歲喪夫。子鄒宏。方在齠髻。矢志苦守。撫孤成立。娶周氏爲配。止生一子。鄒國麟。宏隨物故。周氏年僅二十五歲。藐爾一孤。兩寡相依。居氏克全奇節。旣撫孤子。又撫孤孫。周氏得步。前徽旣美。一傳更美。再世今居氏七十有九。周氏年臻五十。姑以節行兼慈。媳以貞志兼孝。瑞鍾一門。雙節可嘉等情。據生員高鴻峯等呈舉。申詳蘇松道。給冰玉雙清匾示獎。今據縣府覆看申道。該本道參看得居氏周氏。一貞共砥。兩寡相依。居則淒風苦雨。一生撫孤子。辱孫周則繼美紹徽。半世依耄姑。弱肩節以繼節。寡婦所難。予以旌揚。允堪風世。

節婦陳氏。故儒士歸文達妻。十八歲婚。二十一寡。現年六十三歲。守貞四十二年。當三載相夫克修婦道。一朝分袂。決志從亡。因以堂有七旬垂白。懷中八月藐孤。乃存一身。以肩生養死葬之任。綿一息以撫承先。敗後之人。洎乎同室操戈。毀巢殺卵。氏能百計支傾。風雨無恙。截髮供師。斷機誨子。母道與師道並隆。真烈與真節交著。據生員查維典等呈舉。詳蒙學院石批允旌獎。又經本道先給松筠比操四字旌門。今據府縣覆看申道。該本道參看得陳氏青年失偶。矢志未亡。竭菽水以承堂上之歡。茹荼苦而鞠懷中之。盾外侮爲弭。大節克盡。允宜題旌。以風未俗。

節婦宗氏。故前朝候選經歷蘇時化之妻。生員蘇融之母。十六歲嫁夫。二十六歲夫故。霜幃苦守。矢志之始。年未逾夫三十。柏節彌堅。從一而終。壽已過于六旬。處閨閣者。不過二。八齊眉案者。不過十年。惟有一子。止有一婦。亮節格。天赴炤。而反風滅火。貞心化盜。臨危而易暴。爲仁。二。寡母而兩世。單傳嘆爲父。爲師之兼。至一孤。婺而三喪。並舉欽。婦道妻道之克全。氏能教子成名。閭里喧傳孟母。融能事親盡孝。宗黨咸譽。曾參一門節孝。允宜旌表等情。據生員沈錯等呈舉。申詳本道。先給節孝匾示旌。又奉撫鹽兩院嘉獎。今縣府覆看申道。該本道參看得宗氏十六于歸。二十六而遽歌薤露。冰霜之操。歷四十年。且襁褓五月之孤。教以有成。首若蓬飛。心如荼苦矣。其子蘇融。竭力事母。此彼蒼之所以報苦節也。德萃一門。旌榮無忝。

貞女周氏。係故民顧士彥妻。周行簡女。未婚喪夫。現年七十一歲。守節五十九年。甫十齡。因父家貧。憑媒卽過顧門。爲養媳。越二載。夫患蠱。氏隨侍湯藥四年。病不起而歿。氏號泣幾絕。矢志靡他。事姑嫜如父母。眼闕。翁姑憐其年少。欲謀更適。氏覺剪髮毀容。議後得寢。依依膝下。代夫承歡。萬歷三十九年。蒙魏知縣憐氏苦節。隨與氏冠報憲給額。歷蒙匾旌。翁姑繼歿。棺殮祭葬。身力勞瘁。紡績荼苦。據生員周森林等呈

舉申詳本道。先給貞婦久潛匾示旌。今縣府覆看申道。該本道參看得貞女周氏。伉儷未偕。湯藥旋侍。四載敦事夫之道。童年矢截髮之操。依二白以承歡。茹荼匪苦。歷七旬而著節。旌典宜膺。

貞女王氏。年十二。許配侯世。仍爲室。納聘再期。喪偶聞訃。悲哀泣血。矢心弗渝。聞勸諭而絕粒者三。聆異議而投繯者再。燕釵初剖。時方一十四年。鸞鏡永分。今已五十三載。荼苦終身。冰清畢世。加以侍奉老親。生事死葬。撫字孤姪。饗殮婚娶。是誠巨室所難。能詎謂華門而幸。遽據生員朱奇胤等公舉詳。蒙按院秦給賞。今縣府覆看申道。該本道參看得王氏之字侯世。仍雖已納問名之采。尙未齊舉案之眉。顧乃聞訃服喪。投繯矢志。童年所難。至老彌篤。榮褒允宜。

直陳殉難等事

浙江胡□□諱文燧
盛京人

爲直陳殉難節烈事。批發台州府理刑推官王階呈詞。呈稱竊念完貞殉難。風化攸關。就義扶倫。閭幃僅覩。今蒙上察。理合表明。本年某月某日。海寇披猖。台城失陷。時職蒙按臺憲牌。取入棘闥。先于七月某日。起程赴省。職家眷在衙。聞變驚惶。恐懼不測。相率殉難。幸獲救甦。獨妾于氏。倉卒投繯。須臾殞命。潔身遂志。聞見俱傷。率蒙憲臺檄取殉難。不敢不據實報聞。云云蒙批仰臨海縣查報等因。蒙此遵行兩學確查。

去後。隨准本學署教諭事。舉人沈某府學署教諭事。訓導吳某。牒稱備行兩學諸生會查去後。隨據府縣兩學廩增附生員某等結覆前來。遵依會同結得。王司理副室于氏。委于八月二十六日。台城被寇。韓弁外通。變起倉卒。于氏竟長號不食。密自投纆。家人奔救無及。以士女之風規。表丈夫之烈節。見聞嗟異。今古罕儔。堪名外史。以備采風等情。據此該卑職等。看得台郡慘變。士女罹災。非具烈丈夫之性者。鮮克完真而潔志也。王司李副室分列小星行。同皎日。端嚴固繇于主德。貞烈實出自天生。當司理赴省入棘。適遭海寇圍城。至八月二十日。火光接天。砲聲震地。城守雖嚴。人驚風鶴。獨司理之門。杳若無聲。已共欽其閫範有素矣。至二十六日。叛弁外通。東門失陷。各職紳士。只欠一死。四散驚逃。獨司理門內。相率殉難。幸獲救甦。于氏乃雉經以殞。損軀殉難。秉義扶綱。烈烈而死。寧不愧夫汶汶而生者乎。閩郡聞之。無不感泣。正氣所鍾。世風攸賴。允宜特題。以正化源。以光青史者也。復行訓導方某。覆勘無異。取具師生各結狀牒覆前來。又據坊里老方某等。遵依結得。台郡八月廿六日。海寇猖獗。男婦驚惶。王推官奉取入簾。家眷在衙。誠恐不測。相率殉難。副室于氏。投纆殞命。官清妾烈。希世奇聞。理合具結等情前來。准此該本縣署縣事。經歷吳某。看得海寇攻陷台郡。魚鳥驚亂。玉石不分。獨理刑副室于氏。冰潔自持。從容就死。閨房鍾秀。

英魂偕天燧並峙。海內流徽。芳名與日月同光。獨全大義。不愧小星。士庶慕風。口碑載道。所當旌異。請題以彰奇節者也。緣奉批查事理。卑職未敢擅便。擬合詳覆。云云

前事

覆看得台司李王階之妾于氏。雖列小星。能全大節。臨難不變。惟貞一以盟心。見義必爲。罔二三之介念。波揚鯉海。頸繫燕樓。誠閨閫之令節。巾幗之完人也。宜表碣石。以光褒典。茲據道縣查勘前來。本司覆核無異。理合呈請具題旌表。此亦廉頑起懦之一端也。等因呈詳去後。奉本都院批。仰候具題繳奉本部院李批。于氏以小星殉難。殊爲可風。仰候撫按二院具題旌表繳。云云等因。准此案照前事。先據臨海縣查覆前來。該本司看得舍生取義。自古爲難。殺身成仁。於今爲烈。在鬢眉尙多柔脫。況在巾幗。猶當翹論者乎。台刑官王階奉取入闈。時遭鄭逆之變。恣意焚掠。其妾于氏。義不受辱。盡節投繯。傳所謂聳清漢之喬葉。有裕徽風。振幽谷之貞蕤。無慚雅意。亟宜題請表揚。以範風俗者也。等因呈詳去後。今准前因。合行知照。爲此仰本官遵奉憲批事理。候各院具題旌表施行。

節孝看語

撫州劉黃中
太守
諱玉瓚
宛平人